

Ke Reschpekt vor grooi Hoor

Wie mer Pensioniste anschmiere kann

Mer kann sich gar nit vorstelle, was sich heitzutach manchi Leit ausdenke, was eigentlich nit grad mit rechte Dinge zugeht. Do verzählt mer doch die Bäsl Mariann, dass bei ihr es Telefon geklingelt hat un es is ihr gsaat gin, dass se zwaa Gutscheine im Wert vun je 10 Eiro un derzu noch e Garnitur Esszeich for sechs Persone gewunn hätt. Ihre Gewinn kann se nor dann im e nowle Hotel abholle, wann se mit ihrem Mann am näkschte Tach dorthin kummt. „Kannscht der jo vorstelle, de Mischko war gleich derbei, weil wer gewinnt nit geere? So sin mer in des Hotel maschiert, ware sogar die erschte, wu vun eem freindliche Weib empfang gin sin. Im Konferenzzimmer sogar. Ufm Tisch ware Schachtle mit Inox-Esszeich ausgestellt. Des Weib hat uns ach gleich die zwaa Gutscheine in die Hand gedrickt un derzu e Faltboge, uf dem wu mer schau han kenne, was mer mit dem gewunnene Geld inkaafe kenne. Mir blättre hin un her, de Mischko stuppt mich mitm Ellbooe un tippt uf e Bohrmaschien. Des hat sovill gheescht: die holle mer! Doch ich war do vorsichticher un han genauer hingschaut. Derbei han ich kunschtatiert, dass etwas nit ganz so in Ordnung is, wie mer sich des vorstellt. Weil mit dene 20 gewunnene Eiro hätt mer nit vill anfang kenne. Alles war gflunkert, weil zahle hätt mer schun misse, wann mer was kaafe hätt wolle. Ich mach em Mischko Zaiche: haue mer ab vun do! Doch der rieht sich nit vum Fleck. Un so staat un staat fillt sich jo der Saal mit Leit, alles Pensioniste. Was mer bis jetz erlebt han, des war noch gar nix, geger des, was dernoh uf uns zukumm is!“

„Ware mer amend hipnotisiert“?

Erschtmol schlickt die Bäsl Mariann trucke, dernoh schennt se weiter: „Des freindlich Weib hat anfang vun aldi Leit un deni ihre Gsundheit zu rede. Dass im Alter es Rheuma plood, die Gelenke weh tun, de Blutdruck hoch is, villi zuckerkrank sin, un, un....

Mer muss e Haufe Geld for Medikamente ausgin, die wu mer wahrscheinlich e Lewe lang schlicke muss. Un dass es jetzer e Firma in Großwardein git, die Abhilf schaffe kann. Ich reiss mei Mischko schun fascht vum Stuhl runer, doch der bleibt wie feschtgenagelt hucke un starrt des Weib an un lest em jedes Wort wie hipnotisiert vun de Leschpre ab. Jetz schwingt des Weibsbild e Ring, so groß wie de Bode vun eem Fässl, dorch die Luft un beteiert, dass des die Rettung for alli Wehwehchen is. Er strahlt magnetisches Feld aus un des uf 40 Zentimeter Entfernung. Dass die Leit des magnetisch Feld ach gspiere, hats em jede de Ring um e Arm ghong un e greesse Kisswacke in die Hand gedrickt. Mei Mischko hat hoch un heilich gsaat, dass er des Feld gspiirt. Ich han awer gsaat, dass ich nix fiehle tu. Do hat des Weib jo behaupt, dass des bedeite tut, dass ich stark krank sin kennt. Un es hat gered wie e Wasserfall, de Mischko hat mer zugespichert: `Egal was der Ring koschte tut, de holle mer mit hem. So e Wunerding kann mer doch nit sause losse`!

Ich han ingsiehn, dass ich momentan nix weiter tun kann, wie abwarte. Wann des Weib de Preis vun Wunerring verrot, werd de Mischko schun zu sich kumme. Doch vorerscht is noch e Iwerraschung kumm. Des Weib hat alli Leit e Zettl gin, sie selle ihre Name druf schreiwe, die Zettle kumme dann in e Schachtl, es find e Ziehung statt un de Gewinner kriet 300 Eiro. De Michko is immer zawwlicher gin. Doch ich han scheen die Zettle gschrieb, em Mischko zum Lese gin, zammgeleet un in die Schachtl geworf. So, han ich gedenkt. Jetz sin ich gspannt, weil ich han falschi Name uf unser Zettle gschrieb. Un wie dann bei der Ziehung unser richtiche Name aus dem Weib seim Maul gsprung is, do is ach de Mischko zu sich kumm, ufgsprung un drauss war er! Vun wu se unser Name gewisst hat? Natierlich schun vun dem Moment an, wu mer als erschti in de Saal kumm un uns zivilisiert vorgstellt han!“